

سامي محفوظ حنا

# رسائل عاشق

أشعار بالعامية المصرية





الطبعة الأولى

الكتاب : رسائل عاشق

شعر : سامي محفوظ حنا

طباعة : دار الرضا للطبع والنشر والتوزيع

رقم الإيداع بدار الكتب : ٢٠٢١/٧١٥٦ م

الترقيم الدولي : 4 - 7-85856-978-977

رئيس مجلس الإدارة

رضا عبادة

المدير العام

العزب فتحي

٩ شارع فاطمة الزهراء من شارع الترابيع

الطوابق - جيزة

ت/ ٠١١١٤٤٨١٤٦١ - ٠١٠٩٠٢٧٢٧٧٦

تصميم الغلاف الفنان / محمد مخلوف

جميع الحقوق محفوظة للمؤلف

## إهداء



إلى كل من كان مصدر إلهام في كتابة هذا الديوان  
فبدونه لم يكتب حرف واحد إلى كل من شجعني إلى  
زوجتي الحبيبة  
والي استاذي الفاضل الدكتور السيد محمد صابر فقد  
كان له الفضل في صدور هذا الديوان

سامي محفوظ حنا

## بتشتاق لمين؟



بتشتاق يا قلبي وتحن لمين  
لناس قلوبهم عليك قاسين  
ما كفكش منهم جراح وأنين  
هجروك بقى لهم سنين  
نسيوك ولحكك مش فاكرين  
بتشتاق يا قلبي وتحن لمين  
كفايا ضاع من العمر سنين  
وكنا فيهم مخدوعين  
حبيناهم وكناليهم مخلصين  
و عمرنا ما كنا عليهم قسين  
شايلينهم في نن العين  
لايوم حسوا بينا  
ولا كانوا لنا مشتاقين  
بتخلص يا قلبي لمين  
لناس باعوك وليك خاينين  
وفر يا قلبي شوقك وحنينك

لناس بيجبوك و شرينك  
مش ناس بالرخيص بيعينك  
خلاص ما بقوش ليك  
سكن قلبهم غيرك  
اتعلموا الحب على إيدك  
سابوك وحبوا غيرك  
وفر يا قلبي شوقك وحنينك  
لناس بيجبوك و شرينك  
=====

## يا حبيبي



كلمة كان نفسي تقولها  
ياما إنتظرت تنطقها  
وأخيراً قالتها بلسانها  
وداني سمعتها وساعتها  
ما أعرفش ايه اللي جralي  
الدنيا إحلوت في عينيه  
وبقيت شايفها بشكل تاني  
الفرحة سكنت قلبي  
وفرقتني أحزاني  
بحب الناس كلها  
وعاوز أخدها في أحضاني  
كلمة يا حبيبي  
لما قالتها إتغير حالي  
وروحي رجعتلي تاني  
وقلبي دق دقات الحب تاني  
ماسمعتهاش بقالى زمان

كانت وحشاني  
كلمة يا حبيبي  
رجعتلي شبابي  
صحيح كنت حاسسها  
لكن كان نفسي أسمعها  
وهي بتقولها لي  
أحلى نغم سمعته وداني  
يا ريت تغلط وتقولها لي ثاني  
=====

## الله يسمح لكم



كنت عاوز أقول لكم  
الله يسمح لكم  
تقبله على لساني  
و قلبي شايل منكم  
لسه فاكركم كل اللي  
عملتوه وقسوة قلبكم  
ليه حرمتونا من بعضنا  
وسرقتوا مننا فرحنا  
وسكنتم الحزن قلبنا  
كنت بشوف الفرحة في عيونكم  
لما بتشوفوا دمعنا  
وبترقصوا على حزننا  
كنا فاكركم ناسنا وأهلنا  
وإحنا منكم وأنتم مننا  
عملنا إيه فيكم إيه ذنبنا  
تفرقونا وتحرمونا من بعضنا

عاوزين تموت الحب في قلبنا  
مهما فعلتم راح يعيش حبنا  
رغم عذاب البعد  
وشوقنا لبعضنا  
أصل حبنا غريب عنكم  
أقوى من الكره اللي في قلبكم  
علشان كده باقول لكم  
الله يسمح لكم  
وينور بالحب قلبكم  
=====

## الوردة المسروقة



ليه سرقت الوردة  
من البستان وقطفها  
راح تدبل وتموت  
وهي بعيدة عن أرضها  
أنا البستاني وعارف بسرها  
ما فكرتش في قطفها  
وكل يوم كنت برعاها  
ووهبت نفسي لها  
وأفرح لما أشوفها  
تفتح وتهديني عطرها  
كانت أجمل وردة في  
البستان ما فيش زيتها  
لما أتعب كنت أقعد جنبها  
وأحكي عن تعبني وفضفضتها  
وهي تهمس في  
وداني وتبوح بسرها

كانت الورود بتغير منها  
لما ادا عيها في خدودها  
عشقتني و أنا عشقتها  
ياما إتغنيت بجمالها  
وكتبت الأشعار لها  
ليه كنت أناني وقطفها  
هي أرضك تناسب أرضها  
تموتها ليه ايه كان ذنبها  
ولا صعب عليك تكون  
لغيرك وإنك ما كنتش لها  
علشان كده قطفها  
ومين البستاني حرمتها  
وحرمة منها  
وإنك كمان خسرتها  
ماتت لما سابك أرضها  
لية قطفها

## بحبك



بحبك وبحبك مجنون  
شايك أجمل إنسانة في الكون  
وعيونك أجمل عيون  
سحروني وبهم أنا مفتون  
شايك رقيقه وقلبك حنون  
قلب صافي لا يغدر ولا يخون  
مخلصة ووفية للعهد تصون  
شايك شمس بتنور الكون  
تدفيني في عز البرد  
وتخبيني جوه العيون  
بيقولوا سحرتيني وبيك مجنون  
وانك وحشة وسوداء اللون  
وأوحش ما فيك العيون  
قولت بحبها زي ما تكون  
أصل قلبهم ما لو ش عيون  
وعيون المحب غير كل العيون

شايك قمر بينور ليلى  
يحلّى معاك السهر  
وأكتب فيك أشعاري ومواويلي  
وأوصف فيك أجمل عيون  
بحبك وبحبك مجنون  
=====

## إنتظار



إنتظار إنتظار إنتظار  
والعمر ضاع في الإنتظار  
إنتظار مش عارف له نهايه  
بس كان له بدايه  
يوم ما تسرعنا في القرار  
يوم ما قولنا لبعضنا  
إحنا ما كناش لبعضنا  
وغلطنا في الإختيار  
كلمه ولعت في قلوبنا نار  
وقررنا نبعد عن بعضنا  
فاكرين نفسنا بكده  
بنصلح غلطت الإختيار  
لا هي عرفت تعيش  
ولا أنا عرفت أعيش  
وعيشتنا بقت مرار  
يوم ماتسرعنا في القرار

ما عادش قدامنا غير إنتظار  
لحظه تجمعنا فيها الأقدار  
وصدفة تتقابل فيها الأنظار  
تنسينا مرارة الشوق ولا إنتظار

=====

## اعاتب عليك



اعاتب عليك ولا معاتبش  
واقول خسارة  
فيك ما تستاهلش  
ازاي قدرت تنسى  
وقلبك قادر يقسى  
ولا حبي ليك هان  
عليك و فيك ما طمرش  
اعاتب عليك ولا معاتبش  
قولي عذرك وأنا اسامحك  
قولي سبب لبعدك وهجرك  
اقبله منك ولو ميتقبلش  
لو مش عارف حبك  
في قلبي قد إيه  
لو مش عارف بعدك  
عني بيعمل في إيه  
كنت عذرتك وسامحتك  
وقولت غصب عنه ما يقصدش

اعاتب عليك ولا معاتبش  
وقول خسارة فيه ما يستاهلش  
لكن أنت عارف  
قد إيه حبي ليك  
قد إيه روعي متعلقه فيك  
وعمري ماتخيلت أهون عليك  
ومن غير ما تودعني  
تسيبني وتمشي  
اعاتب ولا معاتبش  
وأقول خسارة ما تستاهلش  
آخر كلام عندي  
راح أقوله ليك  
لسه باقي عليه  
زي ما انا باقي عليك  
مكاني لسه في قلبك  
ولا بعت اللي شاريك  
ولا انا لحبك ما استاهلش  
وعليك انا معتبش  
خسارة فيك ما تستاهلش

## جاية ليه؟



جايه ليه بتدوري  
تاني فيه على إيه.  
قلبي خلاص حطمتيه  
بعد ما حبي فرطت فيه.  
والعمر اللي عشته معاك  
هان عليك وبعتيه.  
جايه تاني ليه  
بتدوري في على إيه.  
ايه اللي فاضلك عندي  
واللي نسيت إيه فيه تعمليه.  
ايه اللي مدمرتيش  
ورجعه تاني تدمريه.  
اطمني قبل ما تسيبيني  
أنت خلّتيني حطام.  
ما عادش جوايا  
غير الجراح والآلام.

حتى اللسان نسي الكلام  
وكلامك ما يتردش عليه.  
عاوزه من الحيطام إيه  
ولا يمكن جايه تصلاحيه.  
تصلحي ايه ولا ايه  
قلبي زي الاول هترجعيه.  
ولا اللي بعته هترجعي  
من ثاني تشتريه.  
والجرح اللي بينزف جوايا  
بكلمه منك راح تداويه.  
هو القزاز لما تكسريه  
بتعملي فيه ايه.  
بكثير خالص تلميه  
علشان مايجرحكيش ترميه.  
وانت خايفه احررك  
وجايه علشان ترميني  
وعن طريقك تبعديني  
ما تخافيش أنا ما ترميش

الحيطام بكره راح يعيش  
من غيري قلب من غير حب  
إنسان ثاني غير اللي تعرفيه  
ما فيش شيء يآثر فيه.  
جايه ثاني ليه

=====

## شكراً



شكراً شكراً أكثر خيرك  
جت منك وماجتش من غيرك  
شكراً على جرحك وقسوة قلبك  
وإنك خلّتني أعاني من ظلمك  
وعلمت قلبي بقسوتك  
يقسى علي قلبك  
وجه اليوم تحصد  
من عملك وزرعك  
لما تجرب تعرف  
قد إيه إستحملتك  
وقد إيه في قلبي  
كانت مرارة ظلمك  
ساعتها بس راح  
يحس بيه قلبك.  
وتعرف قد إيه  
كنت شريك و بحبك.

أبوه كنت شاريك وبحبك  
وما أقدرش أستغنى عنك  
ومش فارق معايا  
دلوقت بعدك أو قريبك  
ما أنا تعلمت الدرس منك  
إيه راح يجرا لي  
لما تبعد أو أبعد عنك  
ما أنا ياما جرا لي منك  
وقلبي مات من قسوة قلبك  
شكراً على جرحك وظلمك  
علمت قلبي يقسى على قلبك  
و يقدر ينساك و ينسى حبك  
شكرا شكرا كتر خيرك  
جت منك وماجتش من غيرك  
بقلم سامي محفوظ حنا  
جمهورية مصر العربية

## كفاياك



كفاياك حجج واعدار.  
بلاش تشعيلي جوايا النار.  
سنين وأنا عارف حقيقتك.  
بكذب على نفسي وصدق كدبك  
كان أمني يتغير طبعك.  
لكن طبعك ما تغيرش.  
كدبك على طول ما بيخلص  
ومن كثر كدبك  
تهت ملامحك.  
ما عدتش عارفك  
انت إيه إنت كدبه كدبتها  
على روعي وصدققتها.  
يوم ما رسمت صورة  
لحبيبي وكنت تشبهني لها.  
=====

## سؤال



ليه يا حبيبي غيابك طال  
وحالك بقى غير الحال.  
حاسس إنك متغير  
وطبعك بقى عجيب ويحير.  
وما بتردش علي السؤال.  
ليه يا حبيبي غيابك طال  
نسيتني نسيت حبي  
ولا بتتقل و تسوق الدلال  
عمر الخصام بينا ما طال  
بكتير خالص كان يوم  
أنا بنسى و أنت بتنسي  
عمر قلوبنا على بعض ما تقسى  
ونرجع لبعض من  
غير عتاب ولوم.  
مش فاكرين اللي  
حصل بيننا من يوم.

إيه بس غير الحال  
بيرجع يتردد السؤال.  
يمكن من غير قصد زعلتك  
وقولت كلمه بها جرحتك.  
قل لي أنت فين  
ونجي اصالحك  
انتظرتك والانتظار طال  
ويرجع من ثاني السؤال.  
ليه تسيبني للحيرة والظنون  
عقلي راح يخل واوصل للجنون  
إيه غيرك وكان قلبك حنون  
يقولوا خان أقول عمره ما يخون  
يقولوا دوام الحال من المحال  
هو كان رد على السؤال  
وقال ليه غيابه طال  
سؤال

## صدفة



صدفه اتقابلنا ... بعد سنين.  
صحي جوانا ... الشوق والحنين.  
لقينا نفسنا ... فاكرين.  
ملامحنا ... ما غيرتهاش السنين.  
بس العيون... شكلها حزين  
وقفنا قدام بعض ... ساكتين.  
مش مصدقين ... مستغربين  
معقول نتقابل ... بعد سنين.  
وفجأة ... نزلت الدموع.  
قالت ... كل الكلام.  
قد إيه ... القلب موجوع  
قد إيه ... عذاب الفراق والخصام.  
كأن فراقنا ... بقى له أيام.  
الدموع عبرت ... أكثر من الكلام  
لقينا نفسنا ... بنقول لبعضنا سلام.  
بصوت ... كله أنين  
فيه عتاب على الي فات من سنين.

## أشهد يا قمر



أشهد يا قمر على حبنا  
أشهد علي عهدنا  
مهما طال فراقنا  
راح نكون لبعضنا  
مش راح ننسى  
ولا نخون عهدنا  
ولا يسكن القلوب  
حب تاني غير حبنا  
يا ما أنا وحببي  
طال بينا السهر  
نحكي عن حبنا  
وشاهد علينا القمر  
وصلنا إلى أبعد سما  
وسكنا جنب القمر  
والنجوم حوالينا  
عملنا حفلة سمر

حلمنا والحلم كان  
فوق الخيال  
وكان عندنا أمل  
تتحقق الآمال  
حبنا أقوى من  
الصعب والمحال  
حلمنا والليل بينا طال  
وفجأة إختفى القمر  
وظل النهار  
وكل شيء حلمنا  
ببيه لأقايته بينهار  
حتى حبيبي كان  
حلم وإختفى  
مع طلوع النهار  
وغياب القمر  
واتارينى كنت بهرب  
من الحقيقة والقدر  
صاحبت الليل

وغويت السهر  
بحلم واسرح بخيالي  
لما وصلت للقمر  
علشان أنسى  
عذاب الفراق  
و حكم القدر

=====

## مش ناسيكم



أنا مش ناسيكم  
ودائما فاكركم  
ليه تاخذوا  
على خاطركم  
وتقولوا إني بايعكم  
أنا عمري ما  
أستغنى عنكم  
وأبيع الدنيا كلها  
علشان خاطركم  
صدقوني بحبكم  
غصب عني بعدي عنكم  
وحشيني ومشتاق لكم  
كان لازم أبعد عنكم  
علشان يوم ما  
رجعت لكم  
صحيت جواكم

جرحكم  
بعد ما نسيتوا  
وارتاح بالكم  
مستحيل أكون  
السبب في وجعكم  
ولا تهون عليه دموعكم  
علشان بحبكم  
وأتمنى الراحة لكم  
كان لازم أبعد عنكم  
وترجع راحة بالكم  
وأشوف الفرحة  
في عيونكم  
ومن قلبي أفرح لكم  
صدقوني بحبكم  
غصب عني بعدي عنكم  
=====

## كفايه يا قلبي



أقفل يا قلبي بابك  
قدام الحب مهما ندالك  
كفايه منه ما جراك  
كفايه يا قلبي كفايه  
مش راح نعيد الحكايه  
إنت معاه ولا معايه  
ولا العذاب اللي  
شفناه مش كفايه  
خلاص يا قلبي  
وصلنا للنهايه  
خدنا ايه من الحب  
غير عذابنا  
والآلام والجراح  
كانت نصيبنا  
ولاشوفنا يوم  
يسر بخاطرنا  
حبينا واللي حبناه

عمره ما قدرنا  
خلاص يا قلبي  
عن الحب توينا  
بعد ما قسينا  
ومن الهوى دوبنا  
كفايه من الحب  
اللي جراننا  
مش لاقين  
دواء لجرحنا  
من يوم ماحبيننا  
عمرنا مرتاحنا  
وتاه عن سكتنا فرحنا  
ولا جفت في ليلة دموعنا  
ولا عرف النوم طريق عيوننا  
ماهنوش علينا وعليهم هنا  
كفايه يا قلبي كفايه  
مش راح نبدا  
من تاني الحكايه

=====

## إنسيني



إنسى كل اللي كان بينا  
إنسى كل اللي فات  
ما تشيليش للذكرى صورة  
وإمحي كل الذكريات  
والماضي إعتبريه مات  
إنسى كل اللي فات  
وأوعي الحزن يسكن قلبك  
ولا الدمع يجرح خدك  
ولا أسمع تنهيدة كلها آهات  
إنسيني  
إنسى اللي كان السبب في عذابك  
ماتخلينيش أخطر في بالك  
كفايا منى ما جراك  
بغيرتي وجنوني عذبتك  
وباسم الحب خنقتك  
كنت فاكرا إني إمتلكتك

أتاري بيدي ضيعتك  
إنسيني وسيبيني لقدري  
إنسيني لو كنت تقدري  
إنسيني من غير ما تفكري  
في اللي راح يجري  
واللي راح يكون  
أبدا مش راح يتغير الكون  
الشمس هتطلع كل يوم  
والليل هينور بالنجوم  
قلبي مش راح تسكنه الهموم  
حياتي هتصفي بعد الغيوم  
إنسيني وما عليكش لوم  
مش راح أقول  
قلبي كان معاك مظلوم  
=====

## سامحيني



سامحيني .... ظلمتك  
لو دموعي تشفعلي .... عندك  
كنت أبكي .... عمري  
على غلطتي .... في حقك  
على يوم .... ظلمتك  
على يوم .... جرحتك  
شكيت في أخلاصك .... وحبك  
كنت فاكرك .... زيهم  
زي ناس .... عرفتهم  
على قلبي؟ .... امنتهم  
وهما خاينين .... والغدر في طبعهم  
باعوا قلبي وسكينوا غيري قلبهم  
عملتك بذنبهم .... وجنيت على قلبك  
لو دموعي .... تشفع لي عندك  
كنت أبكي .... عمري  
على غلطتي .... في حقك

لسه فاكر اخر .... كلمه قولتھالي  
وعيونك .... بالدموع مودعيني  
قولتلي بكره .... تندم وتدفع الثمن  
حبي واخلاصي .... ليك  
ميتقدرش .... بثمان  
وجه اليوم .... ودار بي الزمن  
ندمت وأنا .... عارف  
مش راح .... ينفع ندم  
مهما كان ... الندم  
مهما كانت .... الدموع  
وصرخة القلب .... بين الضلوع  
عارف مستحيل .... الرجوع  
عمر الدموع مكانت .... بتنور شموع  
وأنت كنت شمعه .... بتنور ليلي  
بتدوبي علشان .... تسعديني  
سامحيني ضيعتك ..... من ايدي  
وعشت أسير .... ظلمه ليلي  
ليل طويل .... ما لوش نهار

النور اللي .... فيه نار  
لاليل بينتهي .... ولا نار بتتطفي  
تعبت من .... الإنتظار  
صرخت بأعلى .... صوتي  
ليه غاب .... عني النهار  
ليه غاب .... عني النهار  
=====

## غلطت



غلطت وكانت غلطة عمري.  
يوم ما أمنتك سلمتك قلبي.  
كنت فاكرك رح تصونه.  
ولا عمرك تفكر تخونه.  
لكن هان عليك بعت قلبي.  
اللي شاريك.  
انا مش عاتب عليك.  
ولا راح افكر فيك.  
هاعيش حياتي كأنك ماكنت.  
مهما كان حبك في قلبي  
مهما كنت هادوس على قلبي.  
وخنق جوايا حبي.  
يا غلطة عمري  
وهبتلك أغلى ما عندي  
قلبي وروحي وعقلي.  
كل ده ما فكرتش فيه.

هان عليك تضحي بيه  
فكرت إنك تهجرني.  
ما فكرتش في عذاب قلبي.  
قسيت قلبك على قلبي  
وبدأت تلعب بعواطفي.  
يا غلطة عمري.  
ياريتني في يوم ظلمتك.  
ولا بكلمه جرحتك.  
كنت عذرتك وسامحتك.  
وهبتك الباقي من عمري.  
يا غلطة عمري.  
كل غلطة وليها تمن.  
حكمت بيني وبينك الزمن.  
قادرينسيني ويدفعك التمن.  
يا غلطة عمري.

=====

## ارجع لي



ارجع لي وكفايه فراق.  
واحشني ولك مشتاق.  
قلبي داب من الاشواق.  
وبقاسي الويل في بعدك.  
مش عارف اعيش بعدك.  
ليه تقسى على قلبك.  
والاسيه مش في طبعك.  
حس بيه واراف بحالي.  
كفايه في بعدك ماجرالى.  
يا اللي في يديك افراحي واحزاني.  
يا اللي في يديك هنا يا وراحت بالي.  
صدقني باحبك  
ولا عمري استغنى عنك  
ليه تبعد عني و تحرمني منك.

=====

## حببت الحلم



حببت الحلم علشان  
فيه مابتفرقنيش  
وبخاف أصحى  
يعذبني إنتظارك  
وما بتجيش  
من غيرك في الدنيا  
مش عارف أعيش  
كنوز العالم من غيرك  
ما تساويش  
لحظه أكون فيها  
جنبك ومعاك بعيش  
لأمته هنفصل  
على دى الحال  
حبيبي إنتظرتك  
والإنتظار طال  
تهت معدتش عارف

إنت حقيقه  
ولا خيال  
ولا إنت حلم حلمته  
تحقيقه محال  
ولا إنت أمل جويا  
صعب المنال  
ولا يمكن تكون  
مجرد سراب  
ملكش وجود  
وإحساسي بيك  
كذاب  
ولا إنت ذكرى وأمل  
كان في الماضي  
وخاب  
راجع تاخذ بتارك  
وتصفي الحساب  
تكوينني بنارك  
و نويلي على العذاب

أنت حلم مالکش وجود

مجرد سراب

وحيبي وإحساسي بيك

كذاب

=====

## كفايه كده



### كفايه كده بجد

موضوعك زاد عن الحد  
إتحملت معاك اللي ميتحملوش حد  
صبري معاك عدي الحدود مش حد.  
جاي تقولي باحبك .... علوزني  
أصدق واعيش معك الحكايه بجد.  
بصراحه كلامك .... مايرضيش حد.  
هو لازم اخرجك .... وليك أصد.  
لو صحيح .... بتحبني بجد.  
لازم يبقى بيني .... وبينك حد.  
بتقول الحب .... ما يتنسيش.  
أبعد عني .... وحب وعيش.  
بس على حبك .... ماتجبرنيش.  
أناراضيه بحياتي .... والغيري بعيش.  
وأنت ليك حياتك .... وليهم بتعيش.  
ما تحرمش نفسك .... منهم

ومن حياتي .... ما تحرمنيش.  
عيش .... حياتك  
اللي كانت .... بختيارك  
عيش وسيني لحياتي .... اعيش.  
علشان حياتي وحياتك .... ما تنهد.  
لازم يكون .... بينا حد.  
اذا كان على الحب .... اللي كان بيننا.  
باب اتقفل .... بالحجاره وتسد.  
كفايه .... كفايه كده بجد.

=====

## غائبين وقريبين



كل سنة وأنتم طيبين

يا حبايبي ..... يا غائبين

مهما كان ..... بعدكم

من قلوبنا ..... قريبين

وحشتوا ..... القلب

وإشتاقت ..... ليكم العين

كل ..... سنة وأنتم طيبين

يا حبايبي ..... يا غاليين

امته ..... راح تفرحونا

ونشوفكم ..... وتشوفونا

ببعدكم عنا ..... والله تعبنا

وتعبنا ..... الشوق ليكم والحنين

كل سنة ..... وأنتم طيبين

بتمنالكم ..... السعادة

و تكونوا ..... فرحانين

ويطول ..... العمر بزيادة

و تعيشوا.....أحلى سنين  
مهما كان..... بعدكم عننا  
من قلوبنا..... قريبين  
وحشتونا وليكم.....مشتاقين  
ومن .....شوقنا إليكم  
بنقضي الليل..... سهرانين  
الشيء..... الذي يفرحنا  
ويسعد..... قلوبنا .  
لما .....نسأل عليكم  
ولا قيكم..... طيبين  
كل سنة..... وانتم طيبين

=====

## كان زمان



كان زمان بعدك يشغلني  
وقربك مني يطمني  
كنت فاكراً هاترق لحالي  
وتحس بالبيجرالي  
اتاري بيحلالك عذابي  
وحيرتي وسهر الليالي  
أنا عارف قلبي ماعتش يهمك  
رغم إنك عارف انه بحبك  
هو كمان معدش يهمه  
تقرب أو تبعد عنه،  
ومع الأيام راح يداوي جرحه  
ويوم ما ينساك يوم فرحه  
بعدها اوع تيجي تفكرنا  
بالماضي وزاي كانت أيماننا  
وتصحي من تاني جرحنا  
وأحنا ما صدقنا  
دوينهاوارتحنا

## لو صحيح



لا أنت ليه..... ولا أنا ليك.  
ليه الحب دى كله..... في قلبي ليك.  
ليه بعد العم..... ده كله  
فاكرك..... مش ناسيك.  
ولما نقابل..... بعض  
أشوف الدموع..... في عينيك.  
وقلبي عاوز يسييني... ويروح ليك.  
عاوز اخذك في حضني مشتاق ليك  
وامسح دموعك..... وطبطب عليك.  
وقولك آسف..... يا ريت  
العمر يرجع..... ووهبه ليك.  
عمري ما كنت... لحد ثاني غير ليك.  
بعيد عني لكن دائما..... بأفكر فيك.  
على طول قلبي..... بيسالني عليك.  
ومهما كان بعدك قلبي بيحس بك.  
بعيد عنك..... وعاش ليك.  
صحيح لا أنت ليه..... ولا أنا ليك.  
بس روحك فيه..... وروحي فيك.

## راح أنساك



راح أنساك وأعرف ألف واحدة . عليك .  
وصورتك تتوه وسط الصور .  
وقلبي ما يتعرفش عليك .  
يحتار يسأل عن مين ولا مين .  
و لو سألته عنك الاقيه نسيك .  
ولما تشوفيني تبقي مش مصدقه عينيك .  
قلبي اللي عاش العمر كله ليك .  
بيعرف النهارده كل يوم واحدة عليك .  
مش راح اكذب عليك .  
وأقول لك مش راح اشميت فيك .  
لما أشوف ندمك وحرقة دموع عينيك .  
ما أنا ياما ترجيتك واحايل فيك  
قلت لك مش بيعك والآخر لحظه شريك .  
قسيت قلبك وهونت عليك .  
بعت بالرخيص اللي كان بالغالي شريك .  
مهما تندمي وبكت دموع عينيك .

مش أرجع ثاني لىك  
قلبي خلاص نسيك.  
تاه وما عادش لىك  
لاملك لغيرك ولا لىك.

=====

## خائف عليك



خائف عليك من غرورك.  
خائف عليك يغرك جمالك.  
ومن كثر خطابك علي بابك.  
صحيح اليوم يومك.  
وكتير منهم طالب إيدك.  
مسحورين بجمالك.  
بس اوعي يسرح بيك خيالك.  
ويقولك مفيش زيك في جمالك.  
وتتعزيزي علي خطابك.  
كلمة راح اقولهلك في ودانك.  
ولا تخرجش من بالك.  
العمر بيعدي يوم ورا يوم.  
وجمالك مشراح يدوم.  
وتلاقي نفسك وحيدة،  
ويصحبك الندم والوم.  
خطابك هيبقوا كتير

وبابك يخطب كل يوم.  
عجوز تلاقيه قاعد  
مشقادر يقوم.  
وواحد عاوزك  
تحكي حكاية أقبل النوم.  
ساعتها لاينفع ندم ولا لوم.  
وتقفلي علي نفسك بابك.  
ويفضل لنفسك سؤالك  
فين جمالك. فين خطابك.  
ضيعهم غرورك وكبريائك  
=====

## ما وحشتكيش



ماوحشتكيش وقلبك  
عني ما سالكيش.  
ازاي ميسالشي و حبي  
في قلبك بيعيش  
ولا إنت نسيتيني  
علشان كده مابتساليش.  
حبك في قلبي معذبني  
ومش عارف من غيرك أعيش  
وحشاني و بسال كثير  
عنك وأنت ما بترديش.  
ولا أنا كنت غلطان مافهمتكيش.  
وبعد العمر ده كله ما أعرفكيش.  
مش كان فيه عهد بينا  
ولا إنت للعهد ما بتوفيش.  
أنا حافظت على عهدي  
وأنت ما حافظتيش

كانت تهون عليه نفسي  
وانت عليه ما تهونيش.  
كنت ليك بعيش  
وانت لحبي مقدرتيش.  
اشتريتك بعمرى وقلبي  
كل ده عندك مايساويش.  
فين ضميرك فين قلبك  
ولا ده كمان ما فيش.  
أنا آسف كلمتك بلغه الحب  
اللي يحسها القلب  
نسيت إنك ما عندكيش  
عشان كده ما فهمتيش  
عشان كده ما قدرتيش  
ليك حق بيه ما تحسيش.

=====

## لما بتزعلي مني



لما بتزعلي مني  
الدنيا بتخاصمني  
ونفسي مش طيقة نفسي  
وروحي بتروح مني  
لما بتزعلي مني  
حس بيه ورافي بحالي  
كفايا في بعدك ما جرافي  
يالي في ايديكي افراحي وأحزاني  
يالي في ايديكي هنايا وراحة بالي  
صدقيني بحبك  
ولا عمري استغني عنك  
وحشاني ومشتقلك.



## عملت خاطر لصاحبي



عملت خاطر لصاحبي  
معملش خاطر ليه  
صعب عليه جرحه  
بكل قسوة جرح فيه  
يوم ما افترقنا انا وحببتي  
سابني أبكي وراح  
يمسح دمعها هية  
وبكل قسوة اتكلم عليه  
كلام م قولتوش  
قالتلو دى صاحبك  
قال من النهارده معرفوش  
إزاي يجرح فيكي  
ويقول الكلام دي عليك  
إزاي هان عليه دموع عنيكي  
انا أقرب منه ليكي  
وبعد ما كنت حبيبها بقيت عدو ليها

قسي قلبها عليه  
بكلامه عني ليها  
خد حبيبتي ونور عنيه  
خد روعي ال كنت عايش بيها.

=====

## حبيبي هاجرني



حبيبي هاجرني وسابني  
وساب لي ذكريات  
حب ضاع وقلب  
في بعده مات  
عمري اللي عشته  
أيام جميله  
من زمن فات  
كان حبيبي معايا  
ما عرفتش سكتنا  
الأحزان والأهات  
ماكنتش تفارق  
وشوشنا الإبتسامات  
و كنا بنضحك  
في عز الأزمات  
مفيش شيء يهمنا  
وإحنا مع بعضنا  
حبنا كان

يعمل معجزات  
كل ده كان من  
زمان فات  
النهارده بنقول  
عليه ذكريات  
يعني العمر اللي فات  
عبارة عن ذكريات  
ما تتنسيش  
عشان كده  
النهارده وبكره  
ما يهمنيش  
في الماضي مع  
الذكريات راح أعيش  
فيها حبيبي موجود  
ما هاجرنيش  
راح أعيش الماضي  
على إنه حاضر  
وهو ذكرى ما تتنسيش

=====

## كفايه يا قلبي



أقفل يا قلبي بابك  
قدام الحب مهما ندالك  
كفايه منه ما جراك  
كفايه يا قلبي كفايه  
مش راح نعيد الحكايه  
إنت معاه ولا معايه  
ولا العذاب اللي  
شفناه مش كفايه  
خلاص يا قلبي  
وصلنا للنهايه  
خدنا ايه من الحب  
غير عذابنا  
والآلام والجراح  
كانت نصيبنا  
ولاشوفنا يوم  
يسر بخاطرنا  
حبينا واللي حبيناه

عمره ما قدرنا  
خلاص يا قلبي  
عن الحب توينا  
بعد ما قسينا  
ومن الهوى دوبنا  
كفايه من الحب  
اللي جراننا  
مش لاقين  
دواء لجرحنا  
من يوم ماحبيننا  
عمرنا مرتاحنا  
وتاه عن سكتنا فرحنا  
ولا جفت في ليلة دموعنا  
ولا عرف النوم طريق عيوننا  
ماهنوش علينا وعليهم هنا  
كفايه يا قلبي كفايه  
مش راح نبداء  
من تاني الحكاياه

=====

## عاوز أقول لك



عاوز أقول لك كلام.

كان نفسي أقوله من زمان

صحيح فات عليه الأوان

أنا بلوم نفسي وندمان

على اللي حصل بينا زمان

كنت عاوز أقول لك أنا غلطان.

وأرجع بينا اللي كان.

كرامتي منعتني

وكانت النتيجة منك

الحرمان

صحيح أنا كبرت وشكلي تعبان

بس حبك في قلبي زي مكان

بتوحشيني واشتاقلك أكثر من زمان

ياما حلمت بيكوقضيت الليل معاك سهران

يمكن تكوني بعيدة عني لكن شاغلاني

ودائما في فكري عاوز أقول لك تيجي نرجع اللي كان .  
ونعيش مع بعض زي زمان ونعوض اللي راح من عمرنا  
وسنين الحرمان لو معجبكيش الكلام اعتبريه من راجل  
خرفان وقولي لي فات الألوان

=====

## ظلمتها



ظلمتها يوم ماجت  
طلبت مني أسمع لها  
طلبت مني أرجع لها  
كدبت عليها وقولت لها  
مش بحبها  
رجعت ودموعها علي خدها  
وحياة عذاب قلبك  
والدمع ال جرح خدك  
لتعذب لعذابك واخدمن قلبي تارك  
ال كذب عليك وقال نسيك  
وهو بحبك وببيدوب فيك  
=====

## سامحيني يا أمي



على اللي عملته  
وأنا صغير  
ياما تعبتك وحبك  
لي ما تغير  
وأنا في بطنك  
تسع شهور  
كل يوم أكبر  
وكل ما أكبر تعبك  
يزيد أكثر وأكثر  
و لما شفتيني فرحتك  
ما كنتش تقدر  
على طول شيلاني  
على صدرك ضماني  
واكلي في ميعاده  
عمره ماتأخر  
على طول عقلك

مشغول بيه وبيفكر  
ولو تعبت عقلك  
من خوفك عليه يشت  
وتدوري على دكتور  
متخصص وأشطر  
وفي الآخر شويه برد  
مش أكثر  
وفضلت على كده  
لحد ما كبرت  
والشعر أبيض وشبت  
لسه بتعامليني  
على إني صغير  
أصلها أم  
وحبها عمره ما تغير  
سواء كنت كبير أو صغير  
=====

## أمي يا أمي



لولا إنت ما كنت أنا  
ولا حسيت في يوم بهنا  
دى إنت يا أمي نبع الحنان  
ومعاك يا أمي بحس بالأمان  
فاكر يا أمي مرة زمان  
كنت خايف وبصرخ  
وفقدت الأمان  
بسرعة جاتيني  
ولصدر ضمتيني  
وحسيت بالأمان  
يا نبع الحنان  
فاكر لما كنت  
تبعدى لحظه عني  
أقوم أصرخ الاقبيك  
جنبي الاقبيك جنبي  
بقلب ملهوف ومليان

على بالخوف  
بتقولي مالك  
يا ابني يا نور عيني  
شلتيني بكل حنيه  
ومسحت دموع عنيه  
نفسي أقدم لك  
ياأمي هديه  
تسد الدين اللي عليه  
لو قدمت لك روي هديه  
عليك ياأمي شويه  
=====

## إشتقت ليك



إشتقت ليك يا أمي

واشتاق حضني

لحضنك

وفي يوم عيدك

أجري عليك أزورك

أبوس وأحضن

تراب قبرك

ماعرفتش يا أمي

غلاوتك

غير لما بعدت عني

وبعدت عنك

وزاد في الدنيا همي

والحمل تقل علقلي

وانت الي كنت

شايله عني

وانا عمري ما شلت همك

ويا ماسال على الخد دمعك

وانت بتصلي عشاني

وتدعى ربك

كان نفسي أجيب لك

هدايا عن حبي تعبر لك

وادخل معاك قبرك

وترمي زي زمان

في حضنك

صحيح لا سمعاني

ولا سامعك

لكن حاسه بيه

وأنا حاسك

وحشاني يا أمي

ومشتاق لك

=====

## حاسب على كلامك



أوعى يكون  
كلامك جارح  
تجرح وتقول  
أعتذر وصالح  
مهما إعتذرت  
وتصالح  
يفضل أثر  
الكلام الجارح  
حتى لو المجروح  
سامح  
قلبه ينزف ويتالم  
ولو طاب الجرح  
يفضل في القلب  
معلم  
أرجوك حاسب  
على كلامك

قبل ما ينطقه  
لسانك  
الكلمة مش مجرد  
كلام في الهواء  
بكلمة ممكن تقتل  
وبكلمة تكون دواء  
حاسب على كلامك  
راعي مشاعر  
اللي قدامك  
بكلمة تجعل  
القلب فرحان  
وكلمة تملأه  
هموم وأحزان  
بكلمة تقوم حروب  
وكلمة تصنع سلام  
بين الشعوب  
وكلمة تغرقك في  
المعاصي والذنوب

وكلمة تطهر قلبك  
وتخليك تتوب  
الكلمة مش  
كلام فاضي  
الكلمة بتحكم  
وتتحكم في القاضي  
سمعت مثل زمان  
في الماضي  
لسانك حصانك  
إن صنته صانك  
أرجوك حاسب  
على كلامك  
قبل ما ينطقه لسانك

=====

## ميت وش



في كل مره..... الاليك بوش  
بارع وماهر في.... الخداع والغش  
كداب وكذبك.. يصدق ما يتكذبش  
فخور بكذبك... عشان مبينكشفش  
ولا عشان الناس..... لها وش  
وانت لوحدك..... بميت وش  
بدل كل يوم..... وشك  
اكذب على نفسك.... وصدق كذبك  
بكره تنعرف..... حقيقتك  
وينكشف خداعك..... وكذبك  
الناس كلها راح..... تبعد عنك  
وتلاقي نفسك..... لوحدك  
فقدت الناس.... واحترامك لنفسك  
وتجري تدور..... بين الوشوش  
مش لاقى..... وشك  
من كثر..... كذب  
انت تهت عن..... ملامحك  
خسرت الناس..... وخسرت نفسك  
وما بقاش..... ليك وش

## دار مسنين



بعد الشقا..... وتعب السنين  
نربي في بنات .....وبنين  
آخرتها عشنا .....في دار مسنين  
لما بقوا .....ولادنا عننا مشغولين  
وإحنا اللي كنا..... بيهم مشغولين  
ولافي يوم كنا.....معاهم مقصرين  
وعليهم من الهوا.....بنبقى خافين  
وفي مستقبلهم..... بنفكر وقلقائين  
ياما تعبنا..... علشانهم  
وعيوننا .....باتوا سهرائين  
كانوا يلعبوا حوالينا ونشيلهم فوق أكتافنا  
رغم تعبنا كنا بيهم فرحائين  
وكبروا ..... مع مرور السنين  
ربنا يحرسهم ويحفظهم من العين  
بس من فعلهم .....قلبي حزين  
أصلهم بينا ..... مابقوش حاسين

ولكلامنا ..... مش طايقين  
 بقينا تقال ..... عليهم  
 ولينا ..... مش مستحلمين  
 و يغيبوا عننا ..... بالشهر والشهرين  
 ولما نعتب عليهم يقولوا معذورين  
 مش فاضيين على طول مشغولين  
 طيب ..... واللي يسأل علينا مين  
 وأولادنا ..... عننا مشغولين  
 وعشان يكونوا ..... مرتاحين  
 رمونا وسابونا ..... في دار مسنين  
 عايشين ..... لكن ميتين  
 وبقينا من شجرة ..... مقطوعين  
 وأولادنا ..... بقوا لينا ناسيين  
 وما بقوش ..... لينا محتاجين  
 وفي بعادنا ..... هم مرتاحين  
 وأحنا كمان ..... عايشين  
 في ..... دار مسنين.  
 أخرة تعب ..... السنين

## كده يا ابني



كبرت يا ابني  
وما شاء الله قويت وعلى أبوك لسانك  
طول واستقويت  
كنت فاكرك سند ليه  
وبعدي كبير البيت  
ليه تخليني أقول  
يا ريت ما ربيت  
ليه تخليني أندم  
على انك في الدنيا جيت  
يوم صوتك ما على  
عليه ووقفت قدامي  
قلبي اتملى من الحزن  
وفاضت عنه أحزاني  
كنت بدعيلك وافرح  
وأنت بتكبر قدامي  
مش عايل هم لما أكبر

وابقى عجوزورجلي مش شيلاني

علشان ابني راح

يكون سندي وعكازي

ونور عينيه ياخذ

بيدي لو العمى جاني

ده أبني وحته مني

عمره ما يهملني

ولا يخليني أحس بضعفي

ولا من عجزني اوعاني

حلمت لك يا ابني بحاجات كتير

تبقى كبير و أحسن مني

تشرف نفسك وتشرفني

وأفتخر بيك واشاور عليك

وبصوت عالي أقول ده أبني

حاجات كتير

كانت لبك في خيالي

بس ما جاش أبدا على بالي

يوم ما تكبر قدامي

بدل ما افرح بيك  
تكون السبب في احزاني  
وخلتني اتمنيت قبل اليوم  
ده كنت من الدنيا انتهيت  
وانت ما كنتش جيت  
ولا كنت على أبوك استقويت

=====

## شيء فظيع



لما تشوف قدامك  
بيوت بتضيع  
زوج عنيد وزوجه  
لا بتسمع ولا بتطيع  
والصوت عالي على  
طول والجار سميع  
بتوصل للضرب والإهانات  
قدام الولاد والبنات  
مش خايفين ولا مهتمين  
مستقبل أولادهم يضيع  
شيء فظيع  
الزوج أصابه الجنان  
يضرب مراته كمان وكأن شيء ما كان  
ويقول أبويا وجدي كانوا كده زمان  
الست تنضرب وتتهان  
لا ترفع صوتها

ولا تسمع الجيران  
علشان أبقى راجل  
في بيتي ولية مكان  
ولا يقولوا مش حاكم مراته  
وسيرتي تبقى على كل لسان  
لازم تضرب مراتك  
تحترمك وتسمعك وتطيع  
شيء فظيع  
زوجه عقلها تعبان  
أسرار بيتها مع الجيران  
ولما زوجها يجي تعبان تحكي  
عن مشاكلها مع فلانه وفلان  
ومشاكل الأولاد كمان  
يسيب البيت ويدور  
له على مكان  
وعلى القهوه يقضي  
الليل مع أصحابه سهران  
ويروح على النوم

تعبان وهلكان  
و النوم طار من عينه كمان  
سهران بيفكر حيران  
وتملك منه إحساس فظيع  
البيت راح ينهد والأولاد تضيع  
شىء فظيع

=====

## ندمان



ندمان علي كل لحظة معاك عشتها.  
علي كل كلمة حلوة ليك قولتها.  
ندمان بمعنى الندم.  
بقولها بكل مافي قلبي حزن وألم.  
أصلك متعرفيش. أصلك مجربتيش.  
متعرفيش يعني ايه حب.  
مجربتيش إحساس قلب حب.  
حبك ليه مكنش حب.  
علشان ملكيش قلب.  
يمكن يكون موجود لكن ملهوش وجود.  
كونه بكون الحجر  
أبدا مش قلب بشر  
مهما كان المكتوب  
مهما كان حكم القدر  
مقدميش غير الهروب  
وعوض الی راح معاك هدر.

=====

## ما بقاش



خلاص ما بقاش فيهاخير  
لما الصغير مايحترممش الكبير  
والأصول والواجب  
ماعادش لهم تقدير  
والإنسان بقى سيده  
المال عبد له وأسير  
الأخ يبيع أخوه  
ويقتل كمان أبوه  
وقبل منهم الضمير  
خلاص ما بقاش فيهاخير  
بيأمر ويتحكم اللي معه فلوس  
وتتحني ليه كل الروس  
يمد يده والكل يبوس  
مش مهم كان ايه  
حتى لو كان في الماضي أجير  
بقى معه فلوس

يشتري النفوس والضمير  
خلاص ما بقاش فيها خير  
لما الجار يجور على الجار  
وفي غيابه ينهب الديار  
لا عامل حساب ولا تقدير  
ايه راح يكون المصير  
خلاص ما بقاش فيها خير  
ميزان العدل بقى مقلوب  
الباطل ينتصر  
والحق أصبح مغلوب  
والمحبه انتزعت من القلوب  
والظلم ساد والكتاف تعبت  
من شيل الذنوب  
وفيروس كورونا الخطير  
جايب رسالة من عند القدير  
علشان الكل يرجع ويتوب  
وإلا الهلاك راح يكون المصير  
ما بقاش فيها خير

## دعوة السلام



تيجي نعيش .....زي الحمام.  
وننشر بين .....الشعوب السلام.  
ونعيش في.....؟ محبه ونام.  
ايدينا في .....ايد بعضنا  
نبنى والحضارات..... تنقام.  
بلاش حروب..... ونطفي النار  
ايدك في .....ايدي نمحي  
آثار الحروب .....والدمار  
ونبنى ونزرع.... ونخلي بلادنا اعمار  
نعيش في سلام .. وامان واستقرار  
ويتجدد الامل..... في قلوبنا  
مع كل طلعه .....نهار  
يتحقق مستقبل .....أولادنا  
بيهم تتقدم .....بلادنا  
بالعلم والعمل..... تبقي في ازدهار  
كفايه حروب .....كفايه دمار.

=====

## اكتب يا قلم



اكتب يا قلم عن الجراح عن الألم.  
اكتب وحكي عن حالتي ووجعتي . عن حبيبي ال ساكنته  
قلبي.

طعني بسكينته وهاجرني.  
اشتريته بالغالي بالرخيص باعني.  
احكي يا قلم عني وعن حبيبي  
لما كنا نقعد سوا                      ونتكلم مع بعضنا.  
وكان كلامنا لقلوبنا دوا.  
ووعود كانت بينا ضاعت في الهواء.  
احكي ماعتش وقت للسكوت  
الأيام بتجري والعمر بيقتل.  
احكي قبل مايجي الموت  
والحقيقة معاه تموت.  
خالیه يعرف اني لسه بحبه.  
لآخر لحظة كنت فيها بموت.



## بحبك يا مصر



بحبك يا مصر مهما قالوا عنك.  
صحيح العيشة فيك مرة  
لكن بحس الأمان في حضنك.  
إنت وطني وأمي الغالية عليه زي م أنا غالي عندك  
مشمكن أبعد عنك  
مين غيري يقدر ظروفك ويشيل همك.  
ميهمكيش ولوملقتش فيك رغيف العيش.  
المهم مصر موجودة      وطن فيه بنعيش.  
بيقولوا الأسعار نار ،      والمرتب مايكفيش.  
عاوزين يكرهوني فيك متخافيش.  
بحبك عاشق ترابك بعيد عنك مقدرش أعيش.  
فيه ال طمعان فيك عاوز يهدك.  
لكن أولادك بأرواحهم بدافعوا عنك.  
أصل إنت شرفنا وعرضنا.  
ندافع عنك لآخر نقطة في دمنا.  
أرواحنا تهون ولايهون شبر من أرضنا.  
ولانستغني يوم عنك.  
نعيش ونموت علي أرضك.  
بحبك يامصر مهما قالوا عنك.

## أعظم إنتصار



ستة أكتوبر كان... أعظم إنتصار.  
عمت فيه الفرحة..... كل شارع  
وكل..... دار.  
العروبه التحدث... ومصر انتصرت  
ورؤسنا ارتفعت.. لما ردينا الإعتبار  
قائد عظيم..... أصدر قرار  
وجيشنا كان مستعد.... اشعلها نار  
وساعات كانت... مواقع العدو دمار  
كانت حرب لرجوع الحق مش هزار  
العدو بقى..... مذهول  
من الصدمه..... جاء لي إنهيار  
ما كانش قدام..... جيشنا اختيار  
الشهاده للرجوع..... بالانتصار  
ستة أكتوبر..... كان لمصر  
ولكل العرب..... أعظم افتخار.



## كفايا حروب



كفايه حروب..... كفايه دمار  
كفايه موت ..... وخراب ديار  
كفايه فتن..... وإشعال النار  
دول بتسقط ..... وإقتصاد بينهار  
ليه تعيش في ظلام وتطفي الأنوار  
ليه حابب الليل ..... وكاره النهار  
واذا كنت كبير ..... ومش همك  
الخراب طايطني ..... وطايك  
مش راح تنفك ..... عظمتك  
إذا كان زرعك..... خراب ودمار  
راح تاخذ نصيبك ..... من حصادك  
سقوط ..... وإنهيار  
كفايه حروب ..... كفايه دمار  
بيننا نصنع سلام ..... بين الشعوب  
ونمحي آثار الحروب ..... والدمار  
ويكون فيه أمان ..... واستقرار

ونشجع الدول .....على الإستثمار  
ويحل السلام ..... محل الدمار  
وبسلاح العلم.....نقضي على الجهل  
والعالم كله..... يعيش في نهار  
ويبقى في خير .....وإزدهار  
لما ايدينا تبقى .....في إيد بعضنا  
نتشجع .....ونواجه الأخطار  
نبني ونزرع..... والبلاد تبقى عمار  
ومايقاش .....بيننا مكان للأشرار  
أصحاب الفتنة .....وإشعال النار  
كفايا حروب .....كفايا دمار

=====

## خلافات زوجيه



حياة زوجية كلها خلافات

زوج بسبب الفلوس

عاش في أزمات

زوجة كل ما تشوفه

بتقوله هات

مستفزة ماتفوتش المناسبات

تكلم العيله

وعيلة العيله

وتعمل عزومات

كترت على الزوج

المشاكل والأزمات

يصرخ في وشها

ويكلمها كلام

كله تجريح وإهانات

والعيشة بقت مش الهيه

بسبب زوجه نكديه

وزوج قلت من جيبه النقدية  
والأطفال بقى هما الضحية  
تعبت حالتهم النفسية  
وتأخروا في  
حياتهم الدراسية  
الأب والأم أطلقوا  
وبقوا الأطفال  
عديم التربية  
ودي نتيجة سوء  
الإختيار قبل  
ما تتجاوز فكر  
وبعدين خد قرار  
علشان العيشة  
ما تبقاش مرار  
وحلم وعمرك  
بأسرة سعيدة ينهار  
فكر ألف مرة قبل الإختيار

=====

## قدري ونصبي



إنت قدري ونصبي  
مهما تعمل فيه حبيبي  
تبعد تهجر تعذب  
باحبك غصب عني  
مش بأيدي  
حبك في دمي  
ماشى في وريدي  
إنت قدري ونصبي  
مهما قسيت علي قلبي  
وبكيت بالدموع عيني  
أنت حبيبي وضي عيني  
عاشقك وبهواك  
مخبيش عليك  
ياما حاولت انساك  
لما تعبت من قساك  
عذب قلبي هواك

واشتاقت عيني لرؤياك  
ولقيت نفسي بـتـمناك  
بتشتهيك وتقول نفسي  
آمنت إنك قدري  
وما أقدرش اتحداك  
=====

## الفهرس

| م   | العنوان               | الصفحة |
|-----|-----------------------|--------|
| ١-  | إهداء .....           | ٣      |
| ٢-  | باشتاق لمين .....     | ٤      |
| ٣-  | يا حبيبي .....        | ٦      |
| ٤-  | الله يسمح لكم .....   | ٨      |
| ٥-  | الوردة المسروقة ..... | ١٠     |
| ٦-  | باحبك .....           | ١٢     |
| ٧-  | انتظار .....          | ١٤     |
| ٨-  | أعاتب عليك .....      | ١٦     |
| ٩-  | جاية ليه ؟ .....      | ١٨     |
| ١٠- | شكرا .....            | ٢١     |
| ١١- | كفاياك .....          | ٢٣     |
| ١٢- | سؤال .....            | ٢٤     |
| ١٣- | صدفة .....            | ٢٦     |
| ١٤- | اشهد يا قمر .....     | ٢٧     |
| ١٥- | مش ناسيكم .....       | ٣٠     |
| ١٦- | كفاية يا قلبي .....   | ٣٢     |
| ١٧- | إنسيني .....          | ٣٤     |
| ١٨- | سامحيني .....         | ٣٦     |
| ١٩- | غلطت .....            | ٣٩     |

| م   | العنوان                | الصفحة |
|-----|------------------------|--------|
| ٢٠- | ارجع لي .....          | ٤١     |
| ٢١- | حببت الحلم .....       | ٤٢     |
| ٢٢- | كفاية كده .....        | ٤٥     |
| ٢٣- | غايبين وقريبين .....   | ٤٧     |
| ٢٤- | كان زمان .....         | ٤٩     |
| ٢٥- | لو صحيح .....          | ٥٠     |
| ٢٦- | راح أنساك .....        | ٥١     |
| ٢٧- | خايف عليك .....        | ٥٣     |
| ٢٨- | ما وحشتكيش .....       | ٥٥     |
| ٢٩- | لما بتز علي مني .....  | ٥٧     |
| ٣٠- | عملت خاطر لصاحبي ..... | ٥٨     |
| ٣١- | حبيبي هاجرني .....     | ٦٠     |
| ٣٢- | كفاية يا قلبي .....    | ٦٢     |
| ٣٣- | عاوز أقول لك .....     | ٦٤     |
| ٣٤- | ظلمتها .....           | ٦٦     |
| ٣٥- | سامحيني يا أمي .....   | ٦٧     |
| ٣٦- | أمي يا أمي .....       | ٦٩     |
| ٣٧- | اشتقت ليك .....        | ٧١     |
| م   | العنوان                | الصفحة |
| ٣٨- | حاسب على كلامك .....   | ٧٣     |

- ٣٩- ميت وش ..... ٧٦
- ٤٠- دار مسنين ..... ٧٧
- ٤١- كده يا ابني ..... ٧٩
- ٤٢- شيء فطيع ..... ٨٢
- ٤٣- ندمان ..... ٨٥
- ٤٤- ما بقاش ..... ٨٦
- ٤٥- دعوة السلام ..... ٨٨
- ٤٦- اكتب يا قلم ..... ٨٩
- ٤٧- باحبك يا مصر ..... ٩٠
- ٤٨- اعظم انتصار ..... ٩١
- ٤٩- كفاية حروب ..... ٩٢
- ٥٠- خلافات زوجية ..... ٩٤
- ٥١- قدرني ونصيبني ..... ٩٦